

SAMOA

Faatulagaina o Aiaiga

Vaega 1 – Faatomuaga

1. Igoa puupuu ma le amataga
2. Faamatalaina o uiga o upu
3. Tulafono e noatia ai le Malo
4. Sini

**Vaega 2 – Faatulagaga e Faafoe
ai Faalavelave Matuia**

5. O le Fono a le Atunuu mo Faalavelave Matuia
6. O le Komiti Faufautua mo Faalavelave Matuia
7. O le matafaioi tauave a le Matagaluega
8. Ofisa Tutotonu a le Atunuu o Faafuoga o Faalavelave Tutupu Faafuasei

**Vaega 3 - Fuafuaina o Faafuoga
o Faalavelave Matuia**

9. O le Fuafuaga a le Atunuu mo Faafuoga o Faalavelave Matuia

10. Faatinoga o malosiaga i lalo o le Fuafuaga a le Atunuu mo Faafuoga o Faalavelave Matuia

**Vaega 4 - Fuafuaina o le Tali
Atu a Lala Sooupu ma Tagata
Lautele**

11. Lala Sooupu e tali atu
12. Fuafuaga a Lala Sooupu e tali atu
13. Fuafuaga a Faalapotopotoga tau Aoaoga
14. Ia atiae e isi lala sooupu ma Faalapotopotoga ni fuafuaga
15. Faamaoniga o Fuafuaga
16. Faatinoga o Fuafuaga
17. Toe iloilogia ma Teuteuga o Fuafuaga

**Vaega 5 - Faalavelave Matuia
ma Faalavelave Tutupu
Faafuasei**

18. Faaaliga Faasalalau o Faalavelave Tutupu Faafuasei

- | | |
|---|---|
| 19. Faaaliga manino o
Faalavelave Matuia. | 22. Tofiga o Leoleo Fesoasoani
ma tagata faigaluega lē tumau |
| 20. Faamaopoopoina o gaoioiga
mo le Toe Faaleleia. | 23. Solitulafono |

**Vaega 6 -Malosiaga
Faatonutonu ma Solitulafono**

21. Malosiaga o Leoleo

Vaega 7 - Aiaiga Eseese

24. Faamalumaluga
25. Tulafono Faatonutonu

Faamatalaga

2007, Nu. 13

O SE TULAFONO e aiaia ai mo le faafuoga o faalavelave matuia ma faalavelave tutupu faafuasei i totonu o Samoa e ala i se fuafuaga manuia ma le faaitiitia o tulaga lamatia, le tali atu ma tualumaga o le toe faaleleia ma le faalauiloaina o le faamaopoopoga i le va o lala sooupu e tali atu, ma mo faamoemoega e fesootai i ai.

[16 Fepuari 2007]

UA FAIA e le Fono Aoaofaitulafono a Samoa i totonu o le Palemene ua potopoto e faapea:-

Vaega 1 - Faatomuaga

1. Igoa puupuu ma le amataga-(1) E mafai ona taua leni Tulafono o le Tulafono o Faafuoga o Faalavelave Matuia ma Faalavelave Tutupu Faafuasei 2007.

(2) O leni Tulafono e tataua ona amata faamamaluina i le aso ua tuuina i ai le maliega a Le Ao o le Malo.

(3) O le faasilasilaga o le amata faamamaluina o leni Tulafono e tataua ona lomua faasalalau i le gagana Samoa ma le gagana Peretania i totonu o le Savali ma se isi nusipepa o lo o faasalalauina i totonu o Samoa.

2. Faamatalaina o uiga o upu-(1) I totonu o lenei Tulafono, ae vagana ai ua manaomia e le mataupu se isi uiga e ese mai ai:

“Fono” o lona uiga o le Fono a le Atunuu mo Faalavelave Matuia;

“Ofisa Sili o Pulega” o lona uiga o le Ofisa Sili o Pulega o le Matagaluega;

“Komesina” o lona uiga o le Komesina o Leoleo ua taua i le Tulafono o Galuega Tau Leoleo 1977;

“Faaaliga manino o Faalavelave Matuia” o lona uiga o le faatinoga o aiaiga o le Fuafuaga a le Atunuu e Faafoe ai Faalavelave Matuia e mafai ai ona tali atu i faalavelave matuia, e faia e le Taitaifono o le Fono a le Atunuu mo Faalavelave Matuia ina ia tusa ai ma le fuaiupu 19;

“faalavelave matuia” o lona uiga o se tulaga ua aliai mai i totonu o so o se vaega o Samoa:

(a) ua tulai mai ai so o se mea na tupu, po o le faalenatura po o so o se isi faiga e ese mai ai, e aofia ai

-

(i) so o se faalavelave faalenatura ua tupu mai ua aafia ai Samoa atoa po o so o se vaega o Samoa; po o

(ii) so o se mu na mafua mai i so o se auala; po o

(iii) so o se vaega o le saogalemu o se vaa po o se vaalele i totonu o Samoa; po o

(iv) so o se faamai pepesi po o so o se faamai ua salalau atu e aafia ai tagata, laau po o manu; po o

(v) so o se mea ua tupu, faalenatura po o so o se isi tulaga e ese mai ai, ua lamatia ai le mauaina o le suavai po o le tulaga aupito manaomia o punaoa o le suavai i totonu o Samoa; po o

(vi) le motusia o fesootaiga i totonu o Samoa po o i le va o Samoa ma isi atunuu; po o

- (vii) so o se isi lava faalavelave e tupu faafuasei ua mafua mai i se faiga ua le manuia, atinae eseese ua le manuia po o mea sese faale tagata soifua; ma
- (b) e aofia ai tulaga taufaamatau po o tulaga lamatia i le soifua o tagata po o le soifua maloloina, po o i le siosiomaga; ma
- (c) e ono manaomia ai le tali atu o lala sooupu i lalo o lenei Tulafono;
- “Komiti Faufautua mo Faalavelave Matuia” o lona uiga o le Komiti Faufautua mo Faalavelave Matuia ua faavaeina i lalo o le fuaiupu 6;
- “Faafuoga o Faalavelave Matuia” o lona uiga o gaoioiga uma ua faia ina ia tusa ai ma lenei Tulafono i le sauniuni mo faalavelave matuia faapea le tali atu, ma mo le toe faaleleia mai faalavelave matuia ma faalavelave tutupu faafuasei;
- “Ofisa o Faafuoga o Faalavelave Matuia” o lona uiga o le Ofisa o Faafuoga o Faalavelave Matuia ua faavaeina ina ia tusa ai ma le fuaiupu 7;
- “Faaitiitia o Tulaga Lamatia o Faalavelave Matuia” o lona uiga o gaoioiga uma ua faia e tuumamaina ai ina ia tusa ai ma lenei Tulafono mo le faaitiitia o lamatiaga o tulaga matautia i tagata lautele ma a latou meatotino;
- “Faalavelave tutupu faafuasei” o lona uiga o se tulaga ua tupu mai:
- (a) e sili atu ona ogaoga na i lo o se faalavelave matuia;
- (b) e ono tulai mai po o sa tulai mai e avea ma mafuaaga o mea ua leiloa a tagata i se tulaga lautele, o meatotino po o le siosiomaga i Samoa po o i totonu o so o se vaega o Samoa; ma
- (c) lea e ono manaomia ai se tuufaatasiga tele ma le faaaogāina o punaoa a Samoa po o e ono sili atu ai le mafaia e Samoa ona faafoe i le faaaogāina o ana lava punaoa;
- “Minisita” o lona uiga o le Minisita o ia lea ua tuuina atu i ai i lalo o le Faavae matafaioi mo lenei Tulafono;
- “Matagaluega” o lona uiga o le Matagaluega i lalo o le Minisita o ia lea e i ai le matafaioi mo lenei Tulafono;

- “Fono a le Atunuu mo Faalavelave Matuia” o lona uiga o le Fono a le Atunuu mo Faalavelave Matuia ua faavaeina i lalo o le fuaiupu 5;
- “Fuafuaga a le Atunuu mo Faafuoga o Faalavelave Matuia” o lona uiga o le Fuafuaga a le Atunuu mo Faafuoga o Faalavelave Matuia ua aiaia i totonu o le fuaiupu 9;
- “ofisa tutotonu a le atunuu mo faafuoga o faalavelave tutupu faafuasei” o lona uiga o se nofoaga ua lautogia i lalo o le fuaiupu 8;
- “vaitaimi o faalavelave tutupu faafuasei” o lona uiga o le vaitaimi o lo o faagasolo ai:
- (a) le faamamaluina o se faaaliga faasalalau o tulaga o faalavelave tutupu faafuasei ina ia tusa ai ma le Mataupu 105 o le Faavae; po o
 - (b) le faamamaluina o se faaaliga manino o se faalavelave matuia ina ia tusa ai ma le fuaiupu 19;
- “Palemia” e aofia ai so o se Minisita o galue e sui tulaga i le Palemia;
- “Faaaliga Faasalalau o Faalavelave Tutupu Faafuasei” o lona uiga o se faaaliga faasalalau ua faaaliga manino ai se tulaga o faalavelave tutupu faafuasei ua faia e Le Ao o le Malo ina ia tusa ai ma le Mataupu 105 o le Faavae;
- “toe faaleleia” o lona uiga o gaoioiga ua faatino i le taimi nei ma mo se taimi umi mo le toefuataiga o meafaitino, soifuaga lautele, tulaga tau i le tamaoaiga ma le siosiomaga, ina ua tuanai ai se taimi o faalavelave tutupu faafuasei;
- “lala sooupu e tali atu” o lona uiga o lala sooupu ua faasinomia i totonu o le fuaiupu 11;
- “fuafuaga a lala sooupu e tali atu” o lona uiga o fuafuaga ua faasinomia i totonu o le fuaiupu 12.

3. Tulafono e noatia ai le Malo – O lenei Tulafono ua noatia ai le Malo.

4. Sini – O sini o lenei Tulafono o:

- (a) le faavaeina o se faatulagaga lelei mo le faafoga o faalavelave matuia ma faalavelave tutupu faafuasei e ala i le uunaiina o le galulue faatasi i le va o lala sooupu faatasi ma le matafaioi tauave i le faafoga o faalavelave matuia ma le faamalosia o lo latou mafai gafatia ina ia faatumauiina pea le tuuina atu o auunaga talafeagai a o faagasolo taimi o faalavelave matuia ma faalavelave tutupu faafuasei;
- (b) le manaomia o le saunia ma le faatinoga o se fuafuaga a le Atunuu mo Faafoga o Faalavelave Matuia e aofia ai fuafuaga ua saunia e lala sooupu ia e tali atu ma isi vaega ma faalapotopotoga ina ia tusa ai ma manaoga o lenei Tulafono;
- (c) le tuuina atu o le pule faataga i tagata ma lala sooupu e galulue ai i taimi o faalavelave matuia ma faalavelave tutupu faafuasei ina ia tusa ai ma fuafuaga ua faamaonia i lalo o lenei Tulafono, ma e manaomia le mataituina ma le faataunuuiina o faatonuga ua tuuina atu ma fuafuaga ua faia e tagata ua faatagaina i lalo o lenei Tulafono;
- (d) le faamalosia i se isi tulaga e ese mai ai le mafai gafatia o le malo, lala sooupu talafeagai ma tagata lautele ina ia faafoe i se taunuuga lelei aafiaga o faalavelave matuia ma faalavelave tutupu faafuasei ma ia faaogāina gaoioiga uma talafeagai e taofia ai po o e faaitiitia ai tulaga lamatia i le soifua, soifua maloloina ma le siosiomaga mai faalavelave matuia faalenatura ma isi faalavelave tutupu faafuasei;
- (e) le faatinoina o faiga faataatitia e faaitiitia ai lamatiaga ma tulaga matautia e mafai ona avea ma faapogai, e mafua ai po o le faatupu atili ai o faalavelave matuia po o faalavelave tutupu faafuasei i totonu o Samoa; ma

- (f) le faafaigofieina o taulumaga ua fuafuaina mo le faatinoga o gaoioiga e toe faaleleia ai, ina ua tuanai faalavelave matuia ma faalavelave tutupu faafuasei.

Vaega 2 – Faatulagaga e Faafoe ai Faalavelave Matuia

5. O le Fono a le Atunuu mo Faalavelave Matuia-(1) Ua faavaeina se Fono a le Atunuu mo Faalavelave Matuia e aofia ai:

- (a) le Palemia, o ia lea o le a avea ma Taitaifono;
- (b) le Minisita, o ia lea o le a avea ma Sui Taitaifono; ma
- (c) isi lava Minisita e mafai ona tofia e le Palemia.

(2) E tatau i le Fono a le Atunuu mo Faalavelave Matuia ona i ai galuega tauave, matafaioi ma malosiaga e pei ona taua mulimuli ane:

- (a) e toe iloilo, faamaonia ma faamaonia aloaia faaletulafono pe talafeagai ai so o se fautuaga po o lapataiga e tuuina atu e le Komiti Faufautua mo Faalavelave Matuia, ma ia tuuina atu faatonuga i Matagaluega a le Malo ma lala sooupu ina ia mautinoa le vave ona faatino o ana faaiuga;
- (b) e manaomia le faatinoina o manaoga ua fuafuaina ua aiaia i Vaega 3 ma le 4 ma ia faamaonia le Fuafuaga a le Atunuu mo Fafoega o Faalavelave Matuia, ma so o se isi fesuiaiga o le Fuafuaga;
- (c) ia faatonuina le faaogāina o le Fuafuaga a le Atunuu mo Fafoega o Faalavelave Matuia a o faagasolo so o se vaitaimi o faalavelave matuia faalenatura po o faalavelave tutupu faafuasei ma ia tuuina atu so o se poloaiga po o se faatonuga talafeagai mo le fuafuaga ina ia faatinoina;
- (d) ia faatonuina le faatinoga o le faaititia o tulaga lamatia, sauniuni, tali atu ma gaoioiga mo le toe faaleleia e lala sooupu uma a le Malo ma isi lala

sooupu o faatinoina matafaioi e fesootai i le faafoga o faalavelave matuia;

- (e) ia tuuina atu so o se isi lava matafaioi po o le faatinoina o so o se isi lava malosiaga e pei ona aiaia i lenei Tulafono, po o le Fuafuaga a le Atunuu mo Faafoga o Faalavelave Matuia.

(3) E mafai e le Sui Taitaifono ona faatinoina malosiaga o le Taitaifono pe afai ua le mafai e le Taitaifono ona faatino ia malosiaga.

6. O le Komiti Faufautua mo Faalavelave Matuia-(1) Ua faavaeina se Komiti Faufautua mo Faalavelave Matuia ma e tatau ona aofia ai faauluuluga o faalapotopotoga talafeagai a le malo ma isi faalapotopotoga e fuafuaina e le Minisita.

(2) E mafai e sui ua tofia o le Komiti Faufautua mo Faalavelave Matuia ona filifilia se sui e faataunuuina ana galuega tauave e faapei ai o se sui auai o le Komiti Faufautua mo Faalavelave Matuia.

(3) O le Komiti Faufautua mo Faalavelave Matuia o le a taitaifono ai le Ofisa Sili o Pulega, o ia lea e mafai ona tuuina atu i so o se sui auai o le Komiti le matafaioi mo le valaauina ma le taitaia o so o se fonotaga a le Komiti.

(4) E mafai e le Komiti Faufautua mo Faalavelave Matuia ona tofia se Sui Taitaifono mai ona sui auai o ia lea e mafai ona ia faatinoina matafaioi a le Taitaifono.

(5) E mafai e le Komiti Faufautua mo Faalavelave Matuia ona faatuina komiti po o vaega galulue ua ia manatu e talafeagai ma e mafai ona:

- (a) tofia ni sui o komiti po o vaega galulue;
- (b) fuafua matafaioi, galuega tauave ma tiute tauave a komiti po o vaega galulue, e tatau ona ogatasi ma lenei Tulafono ma le Fuafuaga a le Atunuu mo Faafoga o Faalavelave Matuia; ma
- (c) faaee atu so o se manaoga i komiti po o vaega galulue ia e ogatasi ma lenei Tulafono ma le Fuafuaga a le Atunuu mo Faafoga o Faalavelave Matuia.

(6) O galuega tauave ma matafai o le Komiti Faufautua mo Faalavelave Matuia o:

- (a) le mataituina ma le toe iloilo o so o se faalavelave matuia po o se faalavelave e tupu faafuasei o agai mai ina ia faanatinati le tuuina atu o fautuaga i le Fono a le Atunuu mo Faalavelave Matuia, ma le faatinoga i se taimi talafeagai lelei o le Fuafuaga a le Atunuu mo Faafuoga o Faalavelave Matuia;
- (b) le faamautinoaina o manaoga fuafuaina ua aiaia mo, i lalo o le Vaega 3 ma le 4 ua faatinoina e tusa ai ma aiaiga o na vaega;
- (c) le toe iloilo ma le faaauuina aloaia faaletulafono o so o se fuafuaga ua saunia i lalo o le Vaega 4 ma so o se ata faataitai o le Fuafuaga a le Atunuu mo Faafuoga o Faalavelave Matuia, po o so o se isi fesuiaiga ua faia i ai, a o le i auina atu ia mea i le Fono a le Atunuu mo Faalavelave Matuia;
- (d) le faamaonia aloaia faaletulafono o fuafuaga ua faia e le Ofisa o Faafuoga o Faalavelave Matuia mo le tauaveina o so o se gaoioiga e faasino i le siitia o le mafai i totonu o Samoa ona tali atu i se taunuuga lelei i faalavelave matuia ma faalavelave tutupu faafuasei;
- (e) le faamautinoaina o le Fuafuaga a le Atunuu mo Faafuoga o Faalavelave Matuia ua lomua faasalalau ma o vaega uma o tagata lautele ua uma ona faailoa i ai tulaga tau faamatau e ono tutupu mai i faalavelave matuia ma faalavelave tutupu faafuasei, ma le manaoga ina ia nofo sauni e tali atu i ia tulaga tau faamatau ina ia puipuia ai le soifua o tagata ma le soifua maloloina faapea le siosiomaga;
- (f) le faamautinoaina o le faatinoga o se faiga tuufaatasi i le va o lala sooupu e faasino i fuafuaga uma mo faalavelave matuia ma faalavelave tutupu faafuasei, faaitiitia o tulaga lamatia ma le sauniuni, ma le tali atu faapea gaoioiga mo le toe faaleleia;

- (g) le faatinoina o faaiuga a le Fono a le Atunuu mo Faalavelave Matuia ma le tuuina atu e le Minisita o taunuuga lelei faatino i aiaiga o lenei Tulafono ma le Fuafuaga a le Atunuu mo Faafuoga o Faalavelave Matuia;
- (h) le faamautinoaina o le faatinoga faifai pea o gaoioiga mo le faaititia o tulaga lamatia e lala sooupu uma e tali atu ma faalapotopotoga o auai ona sui i le Komiti Faufautua mo Faalavelave Matuia;
- (i) le faamautinoaina o le faatinoga o gaoioiga mo sauniuniga e pei ona manaomia, e aofia ai le siitia o tulaga e faalauiloa ai, aoaoga, aoaoga faatupu manatu, fuafuaina ma le faatuina o nofoaga ma fale ma fesootaiga;
- (j) le faamaopoopoina o gaoioiga mo le toe faaleleia e tusa ai o manaoga o le Vaega 4;
- (k) le auai ma le tuuina atu o fautuaga i fonotaga a le Fono a le Atunuu mo Faalavelave Matuia; ma
- (l) le faatinoina o faatonuga ma faaiuga a le Fono a le Atunuu mo Faalavelave Matuia i le vaitaimi o faalavelave tutupu faafuasei ina ia faamaopopo gaoioiga e tali atu ai ma le faatinoga o le Fuafuaga a le Atunuu mo Faafuoga o Faalavelave Matuia i le vaitaimi o faalavelave matuia ma faalavelave tutupu faafuasei.

(7) O sui taitoatasi o le komiti e tatau ona totogiina mai faaputugatupe a le Matagaluega, o ia totogi ma alauni e pei ona faamaonia e le Kapeneta mai lea taimi i lea taimi mo sui auai o Komiti Faatino ma Komiti a le Malo.

7. O le matafaioi tauave a le Matagaluega-(1) E tatau ona faavaeina i totonu o le Matagaluega se Ofisa e Faafueina Faalavelave Matuia.

(2) E tatau ona avea ma faauluuluga o le Ofisa e Faafueina Faalavelave Matuia, le Ofisa Sili o Pulega, o ia lea e tatau ona nafa ma le vaia o le Ofisa.

(3) E mafai e le Ofisa Sili o Pulega ona tuuina atu i se faiga tusitusia malosiaga uma po o nisi o malosiaga e faasino i le puleaina o le Ofisa e Fafoeina Faalavelave Matuia i se isi tagata ofisa o le Matagaluega, ma i so o sea tuuina atu o malosiaga:

(a) e ono mafai ona faia i le noatia ma le fai fuafua i ia tuutuuga, mataupu e tulaga ese po o agavaa e pei ona faamaoti mai i totonu o se faasilasilaga tusitusia o le tuuina atu o se malosiaga;

(b) e mafai ona soloia ma le loto i ai; ma

(c) e le aafia ai le faatinoga o se malosiaga po o le faatinoga o se galuega tauave e le Ofisa Sili o Pulega.

(4) O le aufaigaluega a le Ofisa e Fafoeina Faalavelave Matuia e aafia ai:

(a) ia tagata ofisa o le Matagaluega e pei ona tofia mai lea taimi i lea taimi i galuega i totonu o le Ofisa e Fafoeina Faalavelave Matuia; ma

(b) isi tagata ofisa e mafai ona tofia e galulue i le Ofisa e Fafoeina Faalavelave Matuia mai le Galuega Tau Leoleo, o so o se isi faalapotopotoga e mafai ona faamaonia mai lea taimi i lea taimi e le Minisita, ma i le noatia ma le fai fuafua i so o se tuutuuga ma aiaiga ua malilie i ai i le va o le Ofisa Sili o Pulega ma le lala sooupu e faafaigaluegaina tagata mai le isi matagaluega i le isi matagaluega.

(5) O galuega tauave ma matafaii a le Ofisa e Fafoeina Faalavelave Matuia e:

(a) fesoasoani i lala sooupu ia e tali atu ma tagata lautele i le faailoagofieina, faatino ma auai i gaoioiga e faaitiitia ai tulaga lamatia o faalavelave matuia ma polokalame;

(b) fesoasoani i lala sooupu ia e tali atu ma isi kamupani ina ia saunia fuafuaga e tusa ai ma le Vaega 4;

- (c) tuufaatasia fuafuaga ua saunia i lalo o le Vaega 4 ma tuuina atu ia fuafuaga i le Komiti Faufautua mo Faalavelave Matuia mo le toe iloilo ina ona tuuina atu loa lea i le Fono a le Atunuu mo Faalavelave Matuia mo le faamaoniga;
- (d) tuuina atu le lagolago tau pulega i le Komiti Faufautua mo Faalavelave Matuia ma le Fono a le Atunuu mo Faalavelave Matuia;
- (e) faia ia gaoioiga e pei ona talafeagai ona saunia mo le tali atu i faalavelave matuia ma faalavelave tutupu faafuasei;
- (f) faamaopoopo gaoioiga e tali atu ai ma le faatinoga o le Fuafuaga a le Atunuu mo Faafoga o Faalavelave Matuia a o faagasolo faalavelave matuia ma faalavelave tutupu faafuasei;
- (g) saunia nofoaga ma fale ma le aufaigaluega mo Ofisa Tutotonu a le Atunuu o Faafoga mo Faalavelave Tutupu Faafuasei;
- (h) faasalalau faalauaitete le Fuafuaga a le Atunuu mo Faafoga o Faalavelave Matuia ma feutagai ma tagata lautele ma sui o pisinisi tumaoti ina ia siitia le tulaga o le malamalama o tagata e uiga i fuafuaga mo faalavelave matuia ma faiga ua faamaonia mo le tali atu i faalavelave matuia ma faalavelave tutupu faafuasei;
- (i) faia ia gaoioiga e pei ona talafeagai e fesoasoani ai i vaega o tagata lautele ina ia toe faaleleia mai aafiaga o faalavelave matuia ma faalavelave tutupu faafuasei; ma
- (j) faatino faaiuga a le Fono a le Atunuu mo Faalavelave Matuia, le Komiti Faufautua mo Faalavelave Matuia, ma le tuuina atu e le Minisita o taunuuga lelei faatino i aiaiga o lenei Tulafono ma le Fuafuaga a le Atunuu mo Faafoga o Faalavelave Matuia.

8. Ofisa Tutotonu a le Atunuu o Faafuoga o Faalavelave Tutupu Faafuasei – E mafai ona faamaonia aloaia faaletulafono e le Fono a le Atunuu mo Faalavelave Matuia se tasi (1) po o le sili atu o nofoaga ma fale e avea ma Ofisa Tutotonu a le Atunuu o Faafuoga o Faalavelave Tutupu Faafuasei, i luga o le fautuaga a le Komiti Faufautua mo Faalavelave Matuia.

Vaega 3 – Fuafuaina o Faafuoga o Faalavelave Matuia

9. O le Fuafuaga a le Atunuu mo Faafuoga o Faalavelave Matuia-(1) E tatau ona i ai se Fuafuaga a le Atunuu mo Faafuoga o Faalavelave Matuia mo Samoa ma e tatau ona saunia, faamaonia ma faatinoina e tusa ai ma lenei Vaega.

(2) E tatau ona i ai i le Fono a le Atunuu mo Faalavelave Matuia le matafaioi o le faamaonia lea o le Fuafuaga a le Atunuu mo Faafuoga o Faalavelave Matuia ma e mafai ona tuuina atu i le Komiti Faufautua mo Faalavelave Matuia le malosiaga e faamaonia ai:

- (a) so o se fesuiaiga e talafeagai ona faia i le Fuafuaga mai lea taimi i lea taimi; ma
- (b) so o se vaega o le Fuafuaga o le a faaopoopoina i ai ina ia tusa ai ma lenei fuaiupu.

(3) E tatau ona aofia ai i le Fuafuaga a le Atunuu mo Faafuoga o Faalavelave Matuia fuafuaga ua saunia ma faamaonia e tusa ai ma le Vaega 4 e faasino i:

- (a) sini o le Fuafuaga a le Atunuu mo Faafuoga o Faalavelave Matuia; ma
- (b) se tulaga aoaotetele o lamatiaga mo vaega uma o Samoa; ma
- (c) faatulagaga ina ia faatinoina e faatatau i le faaitiitia o tulaga lamatia i faalavelave matuia; ma
- (d) faatulagaga o gaoioiga, e aofia ai mataupu e faasino i-
 - (i) faatulagaga o sauniuniga;
 - (ii) faatulagaga o le tali atu;
 - (iii) faatulagaga mo le toe faaleleia; ma

- (iv) o pitolaau, matafaioi ma faalapotopotoga o lala sooupu a le malo, faalapotopotoga tumaoti ma komiti o itumalo po o alaafaga; ma
- (e) taualumaga mo le faamaonia ma le faafoeina o fesoasoani faava-o-malo na sailia pe na ofoina mai e tusa ona tali atu i so o se manaoga ua tulai mai i totonu o Samoa mai faalavelave matuia ma faalavelave tutupu faafuasei; ma
- (f) isi faatulagaga tau tupe talafeagai e lagolagoina ai isi tulaga uma o le Fuafuaga; ma
- (g) so o se isi tulaga o faalavelave matuia ma le faafoga o faalavelave tutupu faafuasei lea e manatu le Fono a le Atunuu mo Faalavelave Matuia e mafai ona ausia ai sini o lenei Tulafono.
- (4) I le tuanai ai o le tuuina atu o so o se faamaoniga e tusa ai ma le faafuaiupu (2), e tatau i le Ofisa Sili o Pulega ona:
- (a) faamautinoaina ua lomua faasalalau i le gagana Samoa ma le gagana Peretania i totonu o le Savali ma se isi Nusipepa o lo o faasalalauina i totonu o Samoa le Fuafuaga ua faamaonia po o so o se fesuaiga i le fuafuaga ua faamaonia;
- (b) faatulaga mo le Minisita ia faamaonia so o se faasalalaua faalauaitele ua faia i lalo o le parakarafa (a); ma
- (c) faasalalau le Fuafuaga ua lomua, vaega o le Fuafuaga po o fesuaiga o le Fuafuaga i lala sooupu uma e tali atu ma so o se isi lava faalapotopotoga po o tagata e manatu le Ofisa Sili o Pulega ua talafeagai.

10. Faatinoga o malosiaga i lalo o le Fuafuaga a le Atunuu mo Faafoga o Faalavelave Matuia-(1) E ese mai ai i aiaiga o so o se isi lava Tulafono, a o faagasolo so o se vaitaimi o faalavelave tutupu faafuasei o malosiaga ua faaee atu i so o se lala sooupu, faalapotopotoga po o tagata i lalo o le Fuafuaga a le Atunuu mo Faafoga o Faalavelave Matuia, e tatau ona faatinoina ina ia tusa ai ma tuutuuga ma manaoga ua taua i

totonu o le Fuafuaga a le Atunuu mo Faafuoga o Faalavelave Matuia.

(2) O malosiaga ua faaee atu i luga o so o se lala sooupu, faalapotopotoga po o tagata i lalo o le Fuafuaga a le Atunuu mo Faafuoga o Faalavelave Matuia e tatau ona faatinoina mo le taimi o le faalavelave tutupu faafuasei seia vagana ai ua faalēaogāina po o ua suia e so o se Poloaiaga mo Faalavelave Tutupu Faafuasei ua faia e Le Ao o le Malo i lalo o le Mataupu 106 o le Faavae.

(3) A o faagasolo so o se taimi o le faaaliga manino o faalavelave matuia, e mafai e le Fono a le Atunuu mo Faalavelave Matuia ona fuafua e faapea, ua na o se vaega o malosiaga ua faaee atu i so o se lala sooupu, faalapotopotoga po o tagata i lalo o le Fuafuaga a le Atunuu mo Faafuoga o Faalavelave Matuia e mafai ona faatinoina e tusa ai ona manaomia i lea tulaga ua aliae mai.

10A. Tagata Faigaluega mo Faalavelave Tutupu Faafuasei mai Fafo-(1) E ese mai ai i aiaiga o so o se isi Tulafono, a o faagasolo so o se vaitaimi o faalavelave tutupu faafuasei, e mafai e le Taitaifono o le Fono a le Atunuu mo Faalavelave Matuia ona tuusaunoa mai i so o se tuutuuga tau-ulufale mai po o isi manaoga ia tagata faigaluega mo faalavelave tutupu faafuasei e ulufale mai i totonu o Samoa e ala i le talosaga a le Malo.

(2) So o se tuusaunoaga ua tuuina atu i lalo o le faafuaiupu (1) e faagaoioia mo na o le vaitaimi lava o faalavelave tutupu faafuasei.

Vaega 4 – Fuafuaina o le Tali Atu a Lala Sooupu ma Tagata Lautele

11. Lala Sooupu e tali atu-(1) O lala sooupu o lisiina i totonu o le Faamatalaga, o lala sooupu ia e tali atu mo faamoemoega o lenei Tulafono.

(2) E mafai ona teuteuina le Faamatalaga i tulafono faatonutonu.

(3) Afai o so o se lala sooupu e tali atu ua le toe i ai po o ua suia lona igoa, o le kamupani ua suitulaga i le lala sooupu e tali

atu o le a faatatauina e avea ma lala sooupu e tali atu mo faamoemoega o lenei Tulafono.

12. Fuafuaga a Lala Sooupu ia e tali atu-(1) Seia vagana ai ua tuusaunoaina i lalo o le Fuafuaga a le Atunuu mo Faafuoga o Faalavelave Matuia po o e le Fono a le Atunuu mo Faalavelave Matuia, e tatau i lala sooupu taitasi ia e tali atu ona saunia se fuafuaga e tali atu ai lea e tatau ona tuufaatasia ai mataupu nei e faaogāina i taimi o faalavelave matuia ma faalavelave tutupu faafuasei:

- (a) faatulagaga ina ia malupuipua le soifua maloloina, saogalemu ma tulaga manuia o tagata faigaluega; ma
- (b) faatulagaga ina ia faaauauina ai le tuuina atu o auaunaga i taunuuga lelei ma le lelei faafoe e ono mafai ona i ai; ma
- (c) fuafua tulaga e ave i ai le faamuamua mo le tuuina atu o auaunaga talafeagai pe a tulai mai se tulaga ua faaitiitia ai le mafai gafatia e tuuina atu ai auaunaga masani; ma
- (d) le faailoagofieina o isi lala sooupu ma kamupani o i latou ia e manaomia le galulue felagolagomai ma auala e mafai ai ona ausia atoatoa le galulue felagolagomai; ma
- (e) le faailoagofieina o lala sooupu i fafo latou te faatinoina le tuuina atu o nisi auaunaga talafeagai, pe afai e tulai mai se tulaga ua faaitiitia ai le mafai gafatia i lalo ifo o tulaga masani o faatinoga i totonu o Samoa; ma
- (f) le manaoga ina ia faatino malosiaga faapitoa e siitia ai i le tapulaa maualuga le mafai gafatia e tuuina atu ai auaunaga ma ia faaitiitia ai tulaga lamatia i le soifua o tagata ma le soifua maloloina ma le siosiomaga ma le faailoagofieina o le tagata talafeagai po o tagata o umia tulaga tofi e faatinoina ia malosiaga; ma

(g) o so o se isi lava mataupu talafeagai ua faailoaina e le lala sooupu e tali atu po o le Komiti Faufautua mo Faalavelave Matuia.

(2) E faaopopo i faatulagaga o le tali atu ua faamaoti i lalo o le faafuaiupu (1) o fuafuaga a lala sooupu e tali atu ua saunia e lala sooupu e tali atu, e tatau ona:

(a) faailoagofie ituaiga o faalavelave matuia po o faalavelave tutupu faafuasei e ono manaomia ai le tali atu a se lala sooupu ma le natura o aafiaga e ono tulai mai o faalavelave matuia po o faalavelave tutupu faafuasei i luga o le lala sooupu;

(b) faailoagofie gaoioiga ma taualumaga e faatatau i le faaitiitia o tulaga lamatia ma le tuutiitia o aafiaga o so o se faalavelave matuia po o se faalavelave e tupu faafuasei i luga o faatinoga a le lala sooupu;

i aofia ai se fuafuaga o faatinoga e faasino i mataupu ua faailoa e tusa ai o parakarafa (a) ma le (b);

(d) fuafua mo le toe faaleleia i se faiga e sili ona vave mai aafiaga o faalavelave matuia ma faalavelave tutupu faafuasei.

(3) E tatau ona tuuina atu i le Komiti Faufautua mo Faalavelave Matuia fuafuaga ua saunia i lalo o lenei fuaiupu ina ia tusa ai ma so o se faatonuga ua faia e le Komiti ma ua faafesootai atu i le lala sooupu e le Ofisa Sili o Pulega.

(4) E tatau ona toe iloiloaina e le Komiti Faufautua mo Faalavelave Matuia fuafuaga ua tuuina atu i lalo o le faafuaiupu (3) ina ia mautinoa ai o lo o tausisia manaoga o le faafuaiupu (1) ma o lo o talafeagai ona faaofi i totonu o le Fuafuaga a le Atunuu mo Fafoega o Faalavelave Matuia.

13. Fuafuaga a Faalapotopotoga tau Aoaoga-(1) E tatau i aoga uma ma aoga tulaga iunivesite ona saunia fuafuaga faa-lala sooupu e tali atu ai ina ia tusa ai ma so o se manaoga e faaee atu e le Komiti Faufautua mo Faalavelave Matuia.

(2) O fuafuaga ua saunia i lalo o le faafuaiupu (1) e tatau ona faia mo le faamoemoe:

- (a) e puipuia ai tulaga manuia o tama ma teine aoga ma le aufaigaluega i taimi o faalavelave matuia po o faalavelave tutupu faafuasei e ala i, le avea faatasi ma isi mea, le saunia o lafitaga, meaai, vai inu, lavalava ma isi mea e manaomia mo le soifua; ma
- (b) le faatulagaina mo le saogalemu o le nofoaga o tama ma teine aoga seia toe amatalia a latou aoaoga po o e mafai ona faia ni faatulagaga mo lo latou toe foi atu i o latou nofoaga o nonofo mau ai; ma
- (c) le faaaauuina po o le toe amatalia o aoaoga i se taimi vave lava e ono faatino ai i le tuanai ai o faalavelave matuia po o faalavelave tutupu faafuasei; ma
- (d) i le faaitiitia o so o se tulaga e faalavelaveina ai le aoaoga ua ofoina atu i tama ma teine aoga; ma
- (e) le siitia o tulaga o le faalauiloaina o taualumaga e faatino ma faaaogā, i le va o tama ma teine aoga ma le aufaigaluega i le taimi o faalavelave matuia ma faalavelave tutupu faafuasei.

14. Ia atiae e isi lala sooupu ma faalapopotoga ni fuafuaga-(1) E mafai e le Komiti Faufautua mo Faalavelave Matuia ona valaauina so o se lala sooupu po o se faalapopotoga e atiae se fuafuaga e faatatau i le faafoeina o faalavelave matuia.

(2) E mafai ona avea ma vaega o le Fuafuaga a le Atunuu mo Faafoga o Faalavelave Matuia se fuafuaga ua atiae i lalo o le faafuaiupu (1) ina ia tusa ai ma aiaiga o lenei Vaega.

(3) O Faalapopotoga e fai ma sui mo le manuia o:

- (a) faletalimalo ma tagata e tuuina atu auaunaga mo tagata tafafao mai; ma
- (b) aia tau pisinisi ma alamanuia; ma
- (c) tagata faigaluega ma tagata galulue i totonu o vaega e ono aafia i faalavelave matuia ma faalavelave tutupu faafuasei; ma
- (d) faalapopotoga tumaoti e i ai matafaioi ua mautinoa e faatino ma e faasino i faalavelave matuia ma le faafoeina o faalavelave tutupu faafuasei; ma

(e) nuu ma isi vaega o tagata lautele,
e mafai ona feutagai ma le Komiti Faufautua mo Faalavelave
Matuia i le saunia o a latou fuafuaga.

15. Faamaoniga o fuafuaga-(1) I le noatia ma le fai fuafua i
le faafuaiupu (3), o fuafuaga uma ua saunia i lalo o lenei Vaega e
tatau ona toe iloilo ma faamaonia e le Komiti Faufautua mo
Faalavelave Matuia a o le i tuuina atu mo le faamaoniga a le
Fono a le Atunuu mo Faalavelave Matuia.

(2) O fuafuaga uma ua faamaonia e le Fono a le Atunuu mo
Faalavelave Matuia i lalo o le faafuaiupu (1) e tatau ona avea ma
vaega o le Fuafuaga a le Atunuu mo Fafoega o Faalavelave
Matuia ma e tatau ona faamamaluina ina ia tusa ai ma aiaiga o
lenei Tulafono.

(3) E ese mai i le faafuaiupu (1), e mafai ona tuuina atu i le
Fuafuaga a le Atunuu mo Fafoega o Faalavelave Matuia, ma e
mafai ona filifili le Fono a le Atunuu mo Faalavelave Matuia,
faapea o so o se fuafuaga faapitoa po o le faavasegaina o se
fuafuaga e manaomia ina ia saunia i lalo o lenei Vaega, e mafai
ona faamaonia e le Komiti Faufautua mo Faalavelave Matuia, ma
i luga o lenei faamaoniga ua tuuina atu, o sea fuafuaga o le a tatau
ona avea ma vaega o le Fuafuaga a le Atunuu mo Fafoega o
Faalavelave Matuia, ina ia tusa ai ma aiaiga o lenei Vaega.

16. Faatinoga o fuafuaga-(1) O le matafaioi a lala sooupu
taitasi ia e tali atu, faalapotopotoga o aoga maualuluga ma isi lala
sooupu po o faalapotopotoga e faatatau i ai le fuaiupu 14 i le
faatinoina i se taunuuga lelei o a latou fuafuaga.

(2) E tatau ona faia le faatinoga o fuafuaga uma ina ia tusa ai
ma:

- (a) aiaiga o lenei Tulafono; ma
- (b) aiaiga o le Fuafuaga a le Atunuu mo Fafoega o
Faalavelave Matuia; ma
- (c) so o se Poloaiga o Faalavelave Tutupu Faafuasei ua
faia i lalo o le Mataupu 106 o le Faavae o
faaogāina a o faagasolo i se vaitaimi o
faalavelave tutupu faafuasei.

17. Toe iloiloga ma Teuteuga o Fuafuaga-(1) E tatau ona toe iloilo i taimi e faatonuina e le Komiti Faufautua mo Faalavelave Matuia, ia fuafuaga uma e saunia ma faamaonia ina ia tusa ai ma lenei Vaega.

(2) E tatau i le Komiti Faufautua mo Faalavelave Matuia ona faamautinoa e faapea o le Fuafuaga a le Atunuu mo Faafuoga o Faalavelave Matuia, ma ona vaega taitasi uma ua fausia ai le fuafuaga atoa, ua toe iloiloina:

- (a) i so o se vaitaimi ua manatu le Komiti Faufautua mo Faalavelave Matuia ua talafeagai mo se toe iloiloga; po o
- (b) ia le silia le tolu (3) tausaga talu ona taliaina le Fuafuaga a le Atunuu mo Faafuoga o Faalavelave Matuia ina ia tusa ai ma lenei Tulafono; po o
- (c) i le tuanai ai o taimi taitasi o faalavelave tutupu faafuasei.

(3) E tatau ona tuuina atu fesoasoani e le Ofisa o Faafuoga o Faalavelave Matuia i lala sooupu ia e tali atu, faalapotopotoga o aoga mauululuga, ma isi lala sooupu ma faalapotopotoga e i ai a latou fuafuaga ua faamaonia i lalo o lenei vaega, ina ia toe iloilo ma teuteu a latou fuafuaga taitasi ina ia tusa ai ma lenei fuaiupu.

(4) O teuteuga uma i so o se fuafuaga e afua mai i le toe iloiloga sa faatinoina i lalo o lenei fuaiupu, e tatau ona tuuina atu i le Komiti Faufautua mo Faalavelave Matuia mo le toe iloiloga ma le faamaoniga.

(5) E tatau i le Komiti Faufautua mo Faalavelave Matuia ona tuuina atu fuafuaga uma ua toe teuteuina i le Fono a le Atunuu mo Faalavelave Matuia mo le faamaoniga.

(6) E tatau ona toe teuteu le Fuafuaga a le Atunuu mo Faafuoga o Faalavelave Matuia ina ia tusa ai ma so o se teuteuga ua faia ma faamaonia e tusa ai ma lenei fuaiupu.

Vaega 5 – Faalavelave Matuia ma Faalavelave Tutupu Faafuasei

18. Faaaliga Faasalalau o Faalavelave Tutupu Faafuasei-
(1) E leai se mea i lenei tulafono e aafia ai malosiaga o Le Ao o le Malo e faia ai faaaliga faasalalau o tulaga o faalavelave tutupu

faafuasei i lalo o le Mataupu 105 o le Faavae po o Poloaiga o Faalavelave Tutupu Faafuasei i lalo o le Mataupu 106, i le tulai mai o so o se faalavelave matuia po o faalavelave tutupu faafuasei.

(2) O aiaiga o lenei Tulafono e tatau ona faitauina i le noatia ma le fai fuafua i aiaiga o le Vaega X o le Faavae ma o galuega tauave uma, matafaioi ma malosiaga ua aiaia i lalo o lenei Tulafono e tatau ona tuuina atu ma faatino i le noatia ma le fai fuafua i so o se faatinoga o malosiaga i lalo o le Vaega X o le Faavae e faasino i so o se faalavelave faalenatura po o faalavelave tutupu faafuasei.

19. Faaaliga Manino o Faalavelave Matuia-(1) I le noatia ma le fai fuafua i le faafuuiupu (2) e mafai e le Taitaifono o le Fono a le Atunuu mo Faalavelave Matuia ona tuuina atu se Faaaliga Manino o faalavelave matuia ia e mafai ona faagaioia faatasi ma aafiaga i se taimi vave o aiaiga o le tali atu i faalavelave matuia o le Fuafuaga a le Atunuu mo Fafoega o Faalavelave Matuia, pe afai e tulai mai so o se faalavelave matuia.

(2) Faatoa tatau ona faia se faaaliga manino o se faalavelave matuia i lalo o le faafuuiupu (1) pe afai o le Taitaifono o le Fono a le Atunuu mo Faalavelave Matuia ua manatu e faapea:

- (a) e le mafai ona faia se Faaaliga Faasalalau o Faalavelave Tutupu Faafuasei ina ia tusa ai ma le Vaega X o le Faavae, ona o le auai po o ua lē avanoa Le Ao o le Malo; po o
- (b) o tulaga e tulai mai mo le faatalanoaina e lē alagatatau ai se Faaaliga Faasalalau o faalavelave tutupu faafuasei ina ia tusa ai ma le Vaega X o le Faavae ona o le utiuti o le tulaga e oo i ai o latou aafiaga po o aafiaga e ono tulai mai; ma
- (c) o mataupu e tatau ona faatinoina ina ia faatalanoaina ai tulaga matautia e tulai mai ina ia tusa ai ma le faafuuiupu (4) e mafai ona faatinoina i totonu o le vaitaimi e 48 itula.

(3) I luga o le tuuina atu o se faaaliga manino o faalavelave matuia, e faamamaluina i se taimi vave le fuaiupu 10 ma faaaogāina i le taimi atoa o le faaaliga manino o faalavelave matuia.

(4) I le noatia ma le fai fuafua i le faafuaiupu (5) e faamutaina se faaaliga manino o faalavelave matuia:

(a) i le 48 itula talu ona faia; po o

(b) ina ua faia se Faaaliga Faasalalau o Faalavelave Tutupu Faafuasei a o aloaia pea le faaaliga manino o faalavelave matuia.

(5) E mafai e le Taitaifono o le Fono a le Atunuu mo Faalavelave Matuia ona faalautele atu le faatinoga o le faaaliga manino mo se isi taimi e 48 itula i tulaga e tulai mai pe afai e le i muta le faalavelave matuia ma tulaga e tulai mai ua le gafatia ai e so o se tagata ona faafoe ma ua taofia ai le faia o se Faaaliga Faasalalau o Faalavelave Tutupu Faafuasei.

(6) E mafai ona faaaogāina se Faaaliga Manino o Faalavelave Matuia i Samoa po o so o se vaega o Samoa.

20. Faamaopoopoina o gaoioiga mo le toe faaleleia

(1) O le Komiti Faufautua mo Faalavelave Matuia e i ai le matafaioi mo le faamaopoopoina o gaoioiga mo le toe faaleleia ina ua tuanai so o se faalavelave matuia po o se faalavelave e tupu faafuasei.

(2) E tatau i le Komiti Faufautua mo Faalavelave Matuia ona tauaveina ana matafaioi i lalo o le faafuaiupu (1):

(a) ina ia tusa ai ma so o se faatonuga e tuuina atu mai lea taimi i lea taimi e le Fono a le Atunuu mo Faalavelave Matuia;

(b) i le noatia ma le fai fuafua i le pule a le Matagaluega o Tupe e faatinoina tulaga faafoe i le sailiga o nonogatupe po o le faamatuu atu o tupe mai so o se isi punaoa.

**Vaega 6 - Malosiaga Faatonutonu
ma Solitulafono**

21. Malosiaga o leoleo – I le noatia ma le fai fuafua i so o se faatonuga o faatinoga e tuuina atu e le Komesina, a o faagasolo so o se taimi o faalavelave tutupu faafuasei, e i ai i leoleo le malosiaga e:

- (a) tuuina atu ai faatonuga tatau ma talafeagai i so o se tagata ua manatu o lo o ua i ai i tulaga lamatia po o le a faaono lamatia ai isi tagata;
- (b) avea ai laasaga talafeagai e faamausali ai le tausisia o so o se faatonuga ua tuuina atu i lalo o le parakarafa (a), e aofia ai le faaaogāina o malosi talafeagai e aveesea ai se tagata ia saogalemu ma faamautinoa ai le faaauauina o le saogalemu o lena tagata;
- (c) faia ai so o se laasaga talafeagai e puipuia ai meatotino ua lamatia i taimi o faalavelave tutupu faafuasei;
- (d) manaomia ai so o se tagata ina ia tuua pe ia solomuli mai le ulufale atu i so o se nofoaga ua faaalia manino e le Komesina, po o so o se tagata ofisa ua faatagaina e le Komesina, ua avea o se nofoaga e lamatia ai le soifua o tagata po o le soifua maloloina; ma
- (e) faia so o se mea e faatagaina i le Fuafuaga a le Atunuu mo Faafoga o Faalavelave Matuia.

22. Tofiga o leoleo fesoasoani ma tagata faigaluega lē tumau-(1) So o se vaitaimi o faalavelave tutupu faafuasei e mafai e le Komesina ona:

- (a) tofia ia tagata e avea ma leoleo fesoasoani i lalo o le fuaiupu 10 o le Tulafono o Galuega Tau Leoleo 1977 e pei ona manaomia; po o
- (b) poloaiina leoleo fesoasoani ia galulue loa i lalo o le fuaiupu 10 o le Tulafono o Galuega Tau Leoleo 1977 e pei ona manaomia e; po o

(c) faafaigaluega ia tagata faigaluega lē tumau i lalo o le fuaiupu 11 o le Tulafono o Galuega Tau Leoleo 1977 e pei ona manaomia.

(2) Ia faitauina faatasi le Tulafono o Galuega Tau Leoleo 1977 i le noatia ma le fai fuafua i lenei fuaiupu.

23. Solitulafono-(1) O se tagata o ia lea:

- (a) ua faalavelave i le faatinoga a so o se Ofisa Tutotonu a le Atunuu mo Fafoega o Faalavelave Tutupu Faafuasei;
- (b) ua faalavelave i so o se meafaigaluega i se Ofisa Tutotonu a le Atunuu mo Fafoega o Faalavelave Tutupu Faafuasei ina ia aafia ai le mafai gafataulimaina o faatinoga a le Ofisa Tutotonu;
- (c) ua faalavelaveina le galuega a so o se tagata ua faatinoina faaetutulafono so o se galuega tauave po o se matafaioi i se Ofisa Tutotonu a le Atunuu mo Fafoega o Faalavelave Tutupu Faafuasei,

ua ia faia se solitulafono ma ua noatia i se sala tupe e le silia le 50 iunite tau faasalaga po o le nofosala i le falepuipui mo se vaitaimi e le silia le tausaga e tasi (1) po o faasalaga uma e lua (2).

(2) O se tagata o ia lea:

- (a) ua faalavelave pe ua ia taofia so o se leoleo i le faatinoga o ona tiute i le taimi o faalavelave tutupu faafuasei; po o
- (b) ua le tausisia so o se faatinoga e tuuina atu e se leoleo i lalo o le fuaiupu 21; po o
- (c) ua faalavelave pe ua taofia so o se isi lava tagata ua faatagaina e faatinoina so o se malosiaga e tusa ai ma le Fuafuaga a le Atunuu mo Fafoega o Faalavelave Matuia i se vaitaimi o faalavelave tutupu faafuasei; po o
- (d) ua le tausisia so o se faatonuga faaetutulafono ua tuuina atu e so o se tagata ua faatagaina e faatinoina so o se malosiaga e tusa ai ma le Fuafuaga a le Atunuu mo Fafoega o Faalavelave Matuia i se vaitaimi o faalavelave tutupu faafuasei,

ua ia faia se solitulafono ma ua noatia i se sala tupe e le silia le 100 iunite tau faasalaga po o le nofosala i le falepuipui mo se vaitaimi e le silia le lua (2) tausaga, po o faasalaga uma e lua (2).

Vaega 7 - Aiaiga Eeseese

24. Faamalumaluga – O se tagata e faatinoina se galuega tauave po o se malosiaga i lalo o lenei Tulafono po o le Fuafuaga a le Atunuu mo Fafoega o Faalavelave Matuia e leai ni noataga i le va o tagata e faatupulaia po o ni noataga tau solitulafono mo se gaoioiga po o mea ua le faia i le agaga faamaoni ma le faautauta mo lenei Tulafono po o le Fuafuaga.

25. Tulafono Faatonutonu – E mafai e Le Ao o le Malo ona faia i luga o le fautuaga a le Kapeneta, tulafono faatonutonu e fuafuaina ai mataupu:

- (a) e manaomia pe faatagaina i lenei Tulafono ina ia fuafuaina; po o
- (b) e talafeagai pe fetai ona fuafuaina mo le tauaveina o po o le faamamaluina o lenei Tulafono.

FAAMATALAGA

Fuaiupu 11

Lala Sooupu ia e tali atu

Matagaluega o Faatoaga ma Faigafaiva
 Matagaluega o Pisinisi, Alamanuia ma Leipa
 Matagaluega o Fesootaiga ma Faamatalaga Tekonolosi
 Matagaluega o Aoga, Taaloga ma Aganuu
 Matagaluega o Tupe
 Matagaluega o Mataupu Tau le Va i Fafu ma Fefaatauaiga
 Matagaluega o le Soifua Maloloina
 Matagaluega o Faamasinoga ma Pulega Tau Faamasinoga
 Matagaluega o Punaoa Faalenatura ma le Siosiomaga
 Matagaluega o Galuega Tau Leoleo ma Falepuipui
 Matagaluega a le Palemia ma le Kapeneta
 Matagaluega mo Tupe Maua

Matagaluega o Tina ma Tamaitai, Atinae o Nuu ma Afioaga ma
Agafesootai
Matagaluega o Galuega, Felauaiga ma Atinae Eseese
Digicel (Samoa) Ltd
Faalapotopotoga o Malosi Faaeletise
Origin Energy Samoa Ltd
Pulega o Malae Vaalele a Samoa
Auaunaga Faa-Soifua Maloloina i Samoa
Faalapotopotoga o Faasalalauga a Samoa
Pulega o Tinei Mu ma Faalavelave Tutupu Faafuasei
Pulega o Taulaga a Samoa
Koluse Mumu a Samoa
Faalapotopotoga o Vaa a Samoa
Pulega o le Suavai a Samoa
Samoa Tel Ltd
Petroleum Products Supplies
BOC Gases
Fono a Ekalesia Soofaatasi

**O le Tulafono o Faafuoga o Faalavelave Matuia ma Faalavelave
Tutupu Faafuasei 2007 o lo o faafuaina e le Matagaluega o Punaoa
Faalenatura ma Siosiomaga**

**Lolomiina e le Failautusi o le Fono Aoao Faitulafono,
i le pule a le Fono Aoao Faitulafono.**